

L'AMICIZIA

E' riccu l'omu quannu c'havi amici
però pi cunfirmallu l'ha pruvari
un muttu anticu c'è ch'ancora dici
di lu chiù megghiu amicu t'ha guardari,
sai n'amicu na vota chi fici ?
si misi a lu zù Bertu a friquintari;
addivintaru amici di famigghia
ma poi si ni fuiu cu sò figghia.

La sira quannu chi si ni fueru
dintra un casottu la notti passaru
iò pi li mè virtù sennu sinceru
nun mi nteressa soccu cumminaru;
criu chi prima chi s'addurmisceru
certu qualchi capricciu s'u passaru;
« e quannu iddu poi s'arruspigghiau
la lassa dda curcata e s'a sgrignau ».

Dda picciuttedda quannu si susiu
e a iddu dda rintra un nu trovau
chiangennu dissi: ci pinzirà Diu
pi chissu chi l'onuri mi livau;
poi sutta la botta risulviu
si misi ncerca fina c'u trovau;
difatti a longa manu lu siguiu
fina chi vitti dunnì si nfilau.

Fici un prugettu chi ci rinisciu
cartucci e na pistola s'accattau
d'un'eleganti omu si vistiu
un beddu mustazzuni s'appizzau
trasennu dintra un bar lu scupriu
e nmezzu a tanti dda lu svirgugnau
poi ci dissi: ci penzi schifu ?
ci spara cinqu corpa e l'ammazzau.

Ma dopu pocu tempu s'accorgiu
chi era ncinta nun si scuraggiau,
sula comu na cani parturiu
lu sò nutricu si lu sustintau;
e cu l'aiutu chi ci retti Diu
fina a la quarta scola lu mannau;
poi parteru pi lu cuntinenti
di tannu mpoi un si sappi chiù nenti.

LA STIRPI

Lu Patr'eternu un gnornu sfacinnatu
dopu chi fici tanta criazioni
taliava assiccu, assiccu lu criatu
sulu, nmezzu sta gran disolazioni;
cun pezzu fangu un pupu ha situatu
ci retti ciatu, lu misi funzioni;
precisamenti un cartuni animatu
chi fannu ora a la televisioni.

Certu l'eternu Patri si priava
virennu tuttu chiddu chi facia,
sulu pi lu iardinu circolava
com n'addevu satava e curria,
quannu chi qualchi mossa la sbagliava
cun sulu sguardu Diu lu riprinnia;
ma finalmenti un gnornu risulviu
ci dissi: lassa fari a modu miu.

Diu chi tantu beni lu vulia,
stu pupu fattu di la sò campagna
rimpruvirallu ci ni dispiacia
mancu ci stava chiui a li calcagna;
e tannu fici natra fissaria
na fimmina ci fici pi cumpagnia;
di tannu mpoi nun ci potti chiui
pirchè l'happi di contru tutti rui.

E fù precisamenti pi stu fangu
vulennu ragiunalla finu a funnu,
p'aviri la grannizza e lu cumannu
s'ha sparsu tantu sangu pi lu Munnu
e nternu meu mi ruru e mi dannu
fazzu tanti dumanni e un mi rispunnu;
pirchè un capisciu lu chi e lu comu
stu pezzu fangu fù chiamatu omu.

Attentamenti facennuci suppa
si pinsamu la nostra discinnenza,
parola d'omu la ula s'attuppa
e dicu: pi la sò disubbidienza;
senza chi nui n'avissimu curpa
l'emu chiangiutu nui la cunsicuenza.
Un muttu si ripeti tutti l'uri
chiangi lu giustu pi lu piccaturi.

Certu, iò nun lu vitti ma lu criu
dintra un gnardinu granni ed'abbillitu
dintra un gnardinu di l'eternu Diu
d'ogni sorti di fruttu ben furnitu,
l'havia raccumannatu a ddù schifiu
chi c'era un sulu fruttu pruibitu;
sapillu quantu idda tantu iddu
s'eru a mangiari giustu giustu chiddu.

Certu chi l'impurtanza un fù lu fruttu
un pumu chi cos'è, cosa di nenti
però fù cunnannatu supratuttu
p'unn' eseguirli li cumannamenti;
a chiangiri si misi a chiantu ruttu
e Diu ci rispuse giustamenti:
pi la tò trasgrissioni e lu piccatu
torni arrè fangu, unni fusti pigghiatu.

Viriti qual'è statu lu passatu
d'Adamu e pirchè fù la sò cunnanna,
dati un'ucchiata a tuttu lu criatu
nmezzu qualunqui razza, virdi o gianna;
l'omu quantu dilitti ha cumminatu
nqualunqui cuntinenti, ad'ogni banna;
ma anchi un liuni murirà affamatu
ma a nautru liuni nun lu scanna.

L'omini nveci, tutti a para a para
in'Africa, in Giapponi o in'Argentina
supra sta terra soccu si ci mpara ?
comu s'ammazza, comu s'assassina:
cu bummi, cu mitraglia, cu lupara,
cu sciabula, cannuna o carrabbina;
cu quali Cori, senza pietati
un frati, chi v'a scanna nautru frati.

E tuttu chistu pi l'umanità
pi l'omu chi nun'ha nuddu cuntregnu,
lu chiamanu prugressu e civiltà
na qualunqui nazioni, statu o regnu
è senza amuri, senza pietà
sulu odiu, grannizza, ira e sdegnu
poi finarmenti quannu piaci a Diu
torna arrè fangu comu si partiu.

LA STORIA DI L'AGGHI
TANNU ERA NE GUARDIE CAMPESTRI

Fù n'annata chi l'agghi ianu cari
na notti mè mughieri mi ricia:
ovannu l'agghi tu l'ha siminari
mannò nun ti curchi chiù cu mia;
ma la simenza l'havia accattari
e ghiò na lira nun la pussiria
mi dissi: ti ni vai a risciuppari
com'è chi fici mè cugnatu 'Ndria.

Prima chi la ricota havia finutu
pi putiri quattru agghi capitari
na matinata scivi risulutu
pi fari na rangata risciuppari
mi vitti n'abbunatu conosciutu
Ninu Stuppagghiu lu vogghiu vantari
mischinu mi chiamau tantu curtesi
e qualchi vinti testi mi ni resi.

Iò lu ringraziavi immenzamenti
cu tanta ducazioni e timpiranza
e iddu rispunniu: cosa di nenti
dù testi d'agghia chi hannu mpurtanza,
tempu di ricota specialmenti
ntra li campagni c'esti l'abbunanza
e nqualunchi abbunatu ti prisenti
ti li rigala comu amurusanza.

Ma iddu sulu fù tantu amurusu
sta bon'azioni fù capaci falla
hiau firriatu cca supra, dda ghiusu
massimamenti ura di nfascialla,
taliava a tutti attusu, attusu
la vacca era sempri parla un parla;
ma pi natura mia sempri affruntusu
un'agghia un mi firai dumannalla.

Haiu na soru natri quattru frati
pi d'cazioni mi pozzu vantari
di nichì, nichì ci fomu nsignati
chi così nun si n'hannu a dumannari
si pigghiati quattru agghi e mi li rati
vì pozzu a unu a unu ringraziari;
ma siddu li vuliti dumannati
iò stu piaciri un v'u fazzu passari.

Quannu sta Puisia ci ricitai
picciotti e vecchi nun vittiru chiui
di tannu mpoi di unni passai
mi ravanu li cucchi a dui a dui;
iò tutti ni don Leddu li mpustai
a Nubia ci fù lu fui, fui
e na matina versu culazioni
mi li mannaru cun motu furgoni.

Prima tutta la terra preparai
iornu pi ghiornu na gran matinata
sessanta cucchi ci ni siminai
facennuci chiossai di na zappata,
li brogni a una a una ci tirai
cottu a lu sulì tutta la iurnata
na giugnu li scippavi e li nfasciai
li lassu nchianu tutta a stagiunata.

Doppu mi cuminciau lu chiffari
a tutti li sinzali scuncicai
cu mè muggheri un vosi chiù scurari
pi ottu misi mancu ci parlai,
nsettemmaru mi l'hivi a caricari
dintra di lu stalluni l'abbirsai
« poi pi sbarazzari lu stalluni
ci li purtai tutti a lu stazzuni ».

PREGHIERA DI L'EMIGRANTI

(Premiata al primo premio « Nino Di Nuovo », 3 Ottobre 1982)

Vergini matri tu m'ha pirdunari
di stu piccatu ch'è pisanti assai:
quannu li scarpi mi sappi attaccari
di mè matruzza mi ni dispisai:
quantu ricchizzi sunnavi accuddari
però la rialtà nun la truvai,
ora pintutu vogghiu riturnari
e gorimi dda vecchia chi lassai.

Fammi turnari arrè na dda casuzza
tirrana, smarunata e ciaccatizza
chi fabbricò mè patri bon'Armuzza
nun calculannu tempu nè stanchizza:
prima chi Cristu li jorna m'accurza
fammi pruvari arrè la cuntintizza
di strinciri a lu pettu mè matruzza
chi pi stu cori è l'unica ricchizza.

Fammj turnari arrè 'ntra li sò vrazza
dunni mi fici ddi sonni nnuccenti
la sò privanza lu cori mi strazza
l'arma e lu corpu cuntinuamenti:
iò mi cuntentu di pani e sputazza
e nò subiri sti maltrattamenti
(vinnutu comu lu pani a la chiazza
e disprizzatu di tutta la genti).

Fammj turnari arrè dintra dd'agnuni
na dda casuzza dintra ddu curtigghiu
dunni chi mè matruzza addinucchiuni
prega e chianci sempri pi stu figghiu:
qualchi ghiurnata scappu a l'ammucciuni
e comu arrivu nmrazza mi la pigghiu
muremu dda diuni tutti rui
abbasta chi mè matri un chianci chiui.

PRIMA SAGRA DU MILUNI - PACECO 23 AGOSTU 1980

Pacecu di na donna fù fundatu
discinnenti di principi e baruna
di massimi biddizzi circumtatu
di vigni, d'oliveti e di limuna;
di genti onuratissima abbitatu
livannucci na pocu scarafuna;
ma di lu Munnu tennu lu primatu
sù spicialista pi fari miluna.

Cunsidirati tutti l'abitanti,
braccianti, burgiseddi e burgisuna
senza scartari a nuddu tutti quanti
hannu stu preu mettiri miluna,
e ci partinu tutti un'annu avanti
nchianura ne custeri, ne timpuna
Lucianu, Salvaturi o Nazzarenu
pensanu prepararari lu tirrenu.

Poi n'aprili tutti acchiffarati
ognunu usirà la sò sperienza
si fannu tutti ddi fossa alliniati
sistati tutti cu na bedda lenza;
sù di sururi tutti assammarati
ed 'a la fini poi pi ricumpenza
doppu chi l'annu beddi siminati
li surci ci và mangianu a simenza.

Tannu sfoganu tutti a santiuna
poi rassignati cu tanta pasienza
cu autobotti, cu fusti e biduna
cu metti acqua, cu metti simenza
fussì duviri di ogni pirsuna
aviri tanta di ricunuscienza
la gran fatica di sti pacicoti
di siminalli tanti e tanti voti.

Ma dopu tutti sti cummattimenti
pari c'affaccia un pocu d'alligria
ed'ogni gnornu è ddà sempri presentu
si metti a culu a ponti e scafunia;
ritorna n'casa chè tuttu cuntenti
dicennu: qualchèr'unu spuntunia;
m'appena nati c'è natru sdirrupu
sunnu mangiati di lu vermi lupu.

Cumencia natra vota a bistimiari
soccu cummina un vi lu sacciu riri,
si metti na ddù fossu a scafuniari
lu vermi è ancora ddà ma nun lu viri,
turnatu n'casa un si ci pò parlari,
mischinu havi cosi di nfuddiri;
e lu n'umani di capa matina:
si metti n'cerca pi la midicina.

Quannu la midicina capitau
mischinu lu problema u risulviu,
pi tuttu lu tirrenu la straviau
tutti ddi vermi chi c'era struriu;
poi vinni giugnu la terra quariau
tempu di nenti la troffa crisciu;
tuttu priatu taliva ddi fogghi
spera d'ovannu livari li mrogghi.

Cunsidirati chi ranni alligria
la cuntintizza ch'unn'haviti rea,
è tutti iorna ddà gira e firria
pinzati: mischineddu si nì prea,
ci dici a so mughieri: Rusalia
speru ch'ovannu maritamu a Lea;
ma cù surpresa vitti na matina
na troffa appigghiatedda di risina.

Ritorna ncasa com'un dispiratu
n'amentri bistimiava com'un Turcu
dissi a so mogghi: sugnu ruvinatu
pigghiami un pezzo corda mi v'a nfercu,
si metti nta na gnuni allampanatu
senza parlari comu mammaluccu;
pi ddi gran cosi torti si capisci;
eppuru sduna arrè; nun s'avvilisci.

Difattj lu viriti ogni matina
purtari appressu lanni e scatuluna,
viremna acqua, pompa e miricina
e v' spruzzannu supra ddi miluna;
difatti la struriu la risina,
certu, cu sti viddani un si raggiuna;
ora lu rici cù tantu di sfrazzu:
struriu la risina e quacinazzu.

Turisti s'a Paceca avvicinati
sugnu sicuru chi vi cunvinciti
virennu sti miluna ammunziddati
firmativi la machina, scinniti
mangiannu sti miluna nzucarati
li baffi v'alliccati si l'aviti
cunsidirati ddi poviri porci
s'accordanu macari cu li scorci.

E ccà si chiuri la mè Puisia
speru chi tanta genti mi pirduna
dumannu scusi a sta gran Signuria
pi tutti li mè sbagghi i mè sgarruna
però vi pregu pi na curtisia
mparativilla tutti sta canzuna
e poi la cantati assemi a mia:
VIVA PACECA E LI SO' GRAN MILUNA.